

Analiza no Rekomendasaun ba Orsamentu Jerál do Estadu 2021 Setór Agrikultura

Husi:
HASATIL no La'ó Hamutuk

Novembru 2020

Observasaun Jerál

Total Proposta Orsamentu Jerál Estadu 2021 mak Biliaun \$1.895. Husi total montante ne'e aloka Millaun \$31.964 (1.69%) ba Ministériu Agrikultura no Peska (MAP). Montante ne'e sa'e dupla kompara ho média persentajen OJE ba MAP iha tinan lima ikus ne'e. Aumenta montante ne'e pasu pozitivu maibé presiza haree ou analiza didi'ak, aumentu hirak ne'e bá programa saida de'it. Se haree ba setór Agrikultura tomak ne'ebé inklui mós alokasaun ba setór agrikultura iha Fundu Infrastrutura, Agrikultura Munisipiu, Agrikultura RAEOA no Fundu Dezenvolvimentu Kapital Umanu, setór Agrikultura tomak hetan millaun \$40.968 (2.16%).

Tabela 1. Proposta alokasaun OJE 2021 ba Setór Agrikultura

MAP	\$31,964,000
Fundu Infrastrutura	\$4,323,000
RAEOA	\$1,103,493
Munisipiu	\$3,578,000
Total	40,968,493

Proposta OJE MAP nian ba 2021 aloka orsamentu boot liu ba iha Bens e Servisu ho montante Millaun \$14.5 no Millaun \$4.1 ba Saláriu no Vensimentu. Iha total Bens Servisu no Saláriu Vensimentu ne'ebé mak maioria gasta ba funsionamentu instituisaun nian hamutuk 58% husi OJE MAP nian. Forsa traballu MAP nian sa'e husi 1,037 (iha 2019) ba 1,153 (2021), no iha mudansa mós iha estrutura MAP nian ne'ebé aumenta Diresaun Jerál foun rua (Direção-Geral dos Serviços Corporativos no Direção-Geral de Cooperação e Desenvolvimento da Instituição), no Diresaun Nasionál foun haat, nune'e aumenta tan alokasaun orsamentu MAP nian ba Saláriu, Bens no Servisu, nsst ba Diresaun foun hirak ne'e.

Haree ba parte programa nian, kuaze 34% husi orsamentu MAP nian aloka ba programa Boa Governasaun no Jestaun Institutional. Alokasaun 35% de'it mak ba programa aumenta produsaun no produtividade. Alokasaun ba atividade hirak nee hodi hadi'ak asesu ba merkadu no mós valores akresentadus 2% de'it. Alokasaun orsamentu ida ne'e la fó vantajen ba MAP nia objetivu atu hasa'e produsaun no mós rendimentu agrikultór sira nian. Ho modelu alokasaun sira hanesan nee mak too oras ne'e Timor-Leste nia produsaun la sa'e significante (Figura 1).




Figure 1. Produsaun batar no hare la hatudu aumentu iha tinan hira ne'e nia laran maski iha investimentu barak ona.

MAP mós presiza klarifika tanba sá alokasaun ba atividade asesu ba merkadu no valores akresentadus ne'e ki'ik tebes, enkuantu peskiza sira hatudu ona katak agrikultór sira sempre halerik kona ba merkadu ba sira nia produktu (Oxfam 2019) no relatóriu kona ba impaktu COVID nian hatudu mós katak maioria agrikultór nia rendimentu tun maka'as durante ne'e (MAP 2020; UNDP 2020; TAF 2020).

MAP aloka mós orsamentu ba atividade sira hanesan peskiza ba variedade ai-han lokál, Konservasaun no mós iha atividade espesífiku ba produsaun adubu orgániku sira. Atividade hirak hanesan ne'e nudár ezemplu atividade agrikultura ne'ebé sustentável tanba di'ak ba ambiente nomos la hatodan agrikultór sira. Sensus Agrikultura 2019 konfirma katak agrikultura nudár baze maioria povu nia moris no ekonomia. Tanba ne'e presiza tebes investimentu no




Figure 2. Alokasaun orsamentu tuir programa boot sira iha MAP nian

planu ne'ebé realistíku no komprensivu hodi responde ba agrikultór sira nia nesesidade ba hasa'e produsaun no asesu ba merkadu nian.

Ba tinan 2021, MAP iha programa prioridade boot 5, sub programa hamutuk 17 no atividade hamutuk 63 (Planu Asaun MAP 2021 iha livru 2B, pájina 202). Forsa de trabalho iha MAP ba

2021 hamutuk 1,153. Ho númeru funsionáriu ne'ebé liu rihun Ida ne'e, tuir loloos MAP bele implementa nia atividade hotu ho di'ak. Dezañi ba MAP mak, oinsá hasa'e produtividade no efisiénsia servisu iha instituisaun laran, hodi atinje prioridade no objetivu MAP ne'ebé define ona iha tinan 2021. Relasiona ho kestaun nee, ami sujere atu MAP define lista prioridade entre 5 -10 de'it, no orienta rekursu umanu no finansas hodi foka ba atinje objetivu husi prioridade sira nee. Bazeia ba kondisaun agrikultura too oras ne'e, nomos tuir relatóriu ikus husi Sensu Agrikultura nian, ami sujere atu MAP foka ba prioridade sira tuir mai ne'e iha 2021:

1. Hadi'ak irrigasaun no mós instala kanál irrigasaun foun ho eskala ki'ik ba iha nivel suku to aldeia sira hodi fornese bee ba atividade produsaun hortikultura, hakiak animal no mós akuakultura.
2. Suporta família agrikultór sira iha preparasaun rai (toos no natar) atu bele uza hotu rai agrikultura ne'ebé sira iha, ne'ebé tuir sensu agrikultura maioria ho rai menus husi 2 ha.
3. Kria kondisaun atu agrikultór sira iha asesu ba fini ne'ebé di'ak molok tempu kultivasaun nian, nomos iha asesu input sira ne'ebé presiza hodi habokur rai no hasa'e produsaun, liu-liu input orgániku sira. Kria mós kondisaun hanesan ba sira ne'ebé hakiak animal no halo akuakultura no peska.
4. Akompañã nafatin agrikultór sira nia prosesu produsaun atu ajuda sira lalais bainhira hasoru problema moras ka peste ba aihoris no mós animal.
5. Suporta agrikultór sira atu hamenus lakon iha faze kolleita nian.
6. Suporta agrikultór sira ba indústriá transformadór sira no mós asesu ba merkadu.
7. Suporta Konservasaun floresta no bee matan sira, atu nafatin fornese bee nato'on ba atividade agrikultura nian.

Komentáriu espesífiku ba programa MAP 2021

Tuir mai ne'e ami nia komentáriu espesífiku kona ba MAP nia atividade sira iha 2021, ne'ebé presiza klarifika no hadi'ak liu tan.

Livru Orsamentu/ Pájina	Konteúdu	Komentáriu	Rekomendasaun
Livru OJE 2 (Portugés),	Programa 574: Aumentu sustentável na produção e da produtividade		
Pájina 202	Atividade 5740101: Pesquisa de adaptação às culturas de arroz, milho, batata doce, mandioca, amendoins, trigo e outras culturas locais	Peskiza ba ai-han lokál sira importante tebe-tebes. Husi tinan 2008 MAP lansa ona fini barak ne'ebé mak introdús husi rai li'ur, liu husi Projetu Fini ba Moris (Seeds of Life). Ezemplu mak hanesan hare variedade Nakroma no mós batar Sele ho Noi Mutin ne'ebé MAP promove maka'as.	Peskiza foun di'ak liu foka ba fini lokál sira ne'ebé agrikultór sira uza kleur ona no adapta ho kondisaun klima rai laran Esperiência ho Fini ba Moris hatudu ona katak fini sira ne'ebé introdús husi rai li'ur la garante hasa'e produsaun, no ita bele haree katak produsaun hare no batar laiha melloramentu signifikante (Figura 1).

Livru Orsamentu/ Pájina	Konteúdu	Komentáriu	Rekomendasaun
Pájina 203	<p>Subprograma 57404: Abastesimentu Sustentável bee ba Agrikultura no hadi'ak efisiénsia utilizaun bee nian.</p> <p>Proposta alokasaun orsamentu: \$65,000</p>	<p>Atividade sira iha programa ne'e nia okos la esprika klaru oinsá atu atinje objetivu programa ne'e nian. Inklui iha atividade ne'e mak sosa Veíku Pezadu (Tronton) rua ho servisu emerjénsia nian ho osan montante \$50,000.</p>	<ul style="list-style-type: none"> • MAP presiza halo klarifikasaun klaru kona ba atividade ne'e, oinsá nia kontribui ba abastesimentu sustentável no hadi'ak efikás utilizaun bee. Se lae, alokasaun hanesan ne'e sei hatodan liu tan de'it orsamentu ba operasionál nian. • Ami rekomenda atu uza osan ne'e atu hadi'ak fomesimentu bee ba atividade hortikultura, ne'ebé mak tuir Sensu Agrikultura 2019, involve 44% husi populasaun ho idade servisu iha Timor-Leste.
Pájina 216	<p>Atividade 5740501: Implementar armazenamento e processamento pós-colheita para apoiar o grupo de agricultores</p>	<p>Kona ba armazenamentu presiza klarifika klaru atu laiha duplikasaun ba armazen seluk ne'ebé governu harii ona, hanesan armazen Centro Lojistiku Nasionál nian</p>	<ul style="list-style-type: none"> • Integra atividade ne'e ho programa loja agrikultura ne'ebé iha ona no governu planu atu too iha nivel munisipiu sira. • Liu husi ne'e bele hametin liu tan loja agrikultura atu iha kapasidade boot liu hodi transforma no distribui produktu sira ne'e ba area sira ne'ebé presiza.
Pájina 216	<p>Atividade 5740603: Produção de fertilizantes orgânicos e biogás, utilizando o Chromolaena odorata</p>	<p>Atividade sira ne'e mak ezemplu atividade agrikultura ne'ebé sustentável tanba di'ak ba ambiente nomos la hatodan agrikultór sira tanba sira la depende ba adubu kímiku sira.</p>	<p>Integra atividade ne'e ba servisu extensionista sira nian atu habelar ba Timor la ran tomak.</p>
Pájina 217	<p>Atividade 5740604: Apoiar a criação de cabras leiteiras, suínos, vacas e galinhas locais e aquisições de raças melhoradas de vacas</p>	<p>'Kriasaun bibi ne'ebé prodús susubeen' ne'e importante tebes ba Timor-Leste tanba ninia importánsia ba hadi'ak nutrisaun iha rai laran, no tanba duran te ne'e ita importa kuaze 100% husi susubeen ne'ebé ita konsumu. Maibé indikasaun dezempeñu ko'alia liu kona ba produsaun hahán, no laiha indikasaun kona ba produsaun susubeen husi bibi rasik.</p>	<p>Aumenta indikadór dezempeñu hodi inklui: <i>Númeru agrikultór hira mak hakiak bibi ne'ebé prodús susubeen no produsaun susu been litru hira mak MAP planu atu atinje iha 2021 ne'e.</i></p>

Livru Orsamentu/ Pájina	Konteúdu	Komentáriu	Rekomendasaun
Pájina 222	Atividade 5750112: Subsídios de transporte para produtos Agrícolas	Laiha alokasaun orsamentu ba atividade ne'e.	<ul style="list-style-type: none"> • Presiza klarifika oinsá atu realiza planu ne'e. • Tenke iha ligasaun nafatin ho programa sira seluk hanesan loja agrikultura, armazenamentu no mós pos-kolleita nian ne'ebé sai mós MAP nia planu ba 2021.
	Atividade 5740703: Subsídios aos agricultores para arroz, milho e hortícolas	Subsídios ne'e en forma fini, adubu no ai-moruk sira. Tinan-tinan sempre iha subsídios hanesan ne'e maibé laiha planu konkretu kona ba oinsá ajuda agrikultór sira atu sira bele halo produsaun fini rasik, liu-liu fini hortikultura sira ne'ebé maioria importa husi rai li'ur.	<ul style="list-style-type: none"> • Husu ba MAP atu publika lista beneficiaries husi subsídios sira ne'e hodi garantia katak subsídios sira ne'e monu ba agrikultór sira ne'ebé presiza duni • MAP tenke esplika sira nia estratéjia hodi hamenus agrikultór sira nia dependénsia ba subsídios • Aloka orsamentu ba peskiza no habarak fini hortikultura la'ós íbrida nune'e agrikultór sira bele habarak rasik fini sira ne'e.

Ne'e mak observasaun no rekomendasaun balu husi ami liga ba OJE nomos Planu Asaun MAP nian ba 2021. Ami hein katak bele ajuda sr/a deputadu/a sira iha diskusaun kona-ba dezvoltamentu setór agrikultura iha tinan oin mai.

Karik iha pergunta ruma favór kontaktu ba koordinadór sekretáriu HASATIL no ekipa advokasia iha email no número kontaktu tuir mai. 77287429 / 77237176 - Email: asoihana@gmail.com

Gil Orasio Boavida
Koordenadór Sek. HASATIL

Mariano Ferreira
La'ó Hamutuk (Rep. Grupu Traballu Advokasia)